

Djuda kute memã pi'ôk no'ôk ne ja.

Jeju kamy 'ôbê ne Djuda. Nãm ar aben djâkam nõ. Jeju kumrêx kato nhym tũmrãm Xijagumê Djudadjwỳ Marij kurũm kato. Kute amim Jeju mar kêt ne kam tũmrãm tu amim markumrêx. Birãm Jeju akubyn tĩn kôt ne tu amim kuma. Ne kam Jeju nhõ me jao ba. Ne kam arkum pi'ôk no'ôk ne. Nãm Ar kubê me 'êxnhĩ pyma. Me 'êxnhĩ amijo Metĩndjwỳnh kabẽn jarẽn djwỳnh ne me kute Jeju marmê abenkam bikâr ne ate ajte memã 'êx ban arĩk ar ban memã mỳjja punu'ã àpnẽn ba. Nhym kam Djuda arkum,

—Kati, Metĩndjwỳnh amrêbê kute me axwemã o pãnhja pumũ. Dja ĩ prĩne me jadjwỳo bikẽn mex ne. Be, ar ga dja gar Jeju'ã angrã tỳx nhym Metĩndjwỳnh dja ar arôrôkbê ar akukrà gar aku'ê tỳx. Nãm ã Djuda arkum ane.

¹Ba ibê Djuda. Ibê Jeju Kritu nhõ àpnẽn. Ibê Xijagu kamy. Ba ne ba pi'ôk no'ôkkam ar amã ikabẽn jarê. Metĩndjwỳnh, me Babãm arỳm amijo ar apytàn amimexo ar ajo mex nhym Jeju Kritu amim ar apytâr mex ne ar ajo ba.

²Gê Metĩndjwỳnh tu kum ar akaprĩ:kumrêx^a ne kum ar ajabê:kumrêx gar adjumar mexo amũ amikamẽn arỳm adjumar mexkumrêx ne.

Me kute axwe'ã memã àpnẽn.

A Ped 2.1

³Akmere, àpnhĩre ar, Metĩndjwỳnh ne kute Krituo me bakunĩ pytâr. Nã bãm amibêx ne bit ije ar amã 'ã pi'ôk no'ôko inhỹrmã. Ba nhỹn arỳm me kute ar anoo biknor prãmja man amim,

—Kati. Dja ba arkum me kute ar noo biknor jarê. Ne arkum, “Wãnh ne me ar akwỳ anoo biknor ba. Kritu ne gwaj bamã amijã ujarẽn pydjĩn arê gwaj babê Kritu nhõ me ja baje mar pydjimã nhym me arỳm 'êx. Ne kam ta amijo Kritu mar mex ne arĩk kupa'ã ar amã 'ã ujarẽn punun ar anoo biknor ba. Me kute ar anoo biknor baja dja gar me 'ãno djãn mã akabẽno me ity gê me anhikrê.” Nã bãm ã amikabẽn maro anen arỳm ar amã arê.

^a2 Djãm ar ga ne gar adjukaprĩ nhym pãnh arỳm kum ar akaprĩ Kati. Ar ga ne gar adjukaprĩ kêt. Ta ne tu kum ar akaprĩkumrêx.

⁴Me kute ar anoo biknorja ne me kum Metĩndjwỳnh kĩnh kêt ne amipdjur mex ne ar akôt wangijn ar amê akà. Nãm me amakkre kêt ne ar amã,

—Ar rã'ãn aben prô, aben mjên kupê. Gêdja Metĩndjwỳnh ate krã. Arỳm ne tu kum ar akaprĩn ar amã ajaxwe kêt jarẽnhkumrêx. Nãm me ã ar amã ane. Ne kam arỳm Bẽnjadjwỳr djwỳnh japrỳ. Kubê ne Metĩndjwỳnh. Nãm me Metĩndjwỳnh pydji japrỳ. Ne ajte Bẽnjadjwỳr djwỳnh bê Kritu japrỳn ar'ã memã kum,

—Djãm mrãmri ne Kritu ar ba? Kati. Nãm me 'êx, ane. Amrêbê me kêtri ne Metĩndjwỳnh arỳm me ja'ã amim karô. Me biknor tokry djãmã kute me anormã ne me'ã amim karô.

Apỳnh me tũmre djàri jaxwe'ã ujarênh.

Mat 7.21; A Ped 2.3; Dju k 3.6

⁵Ba ar amã me kwỳ biknor'ã ajarê gar ama. Gar te arỳm aje me'ã ujarênh mar ba ajte ar amã me'ã ajarê gar ama.

Be, Bẽnjadjwỳr djwỳnh arỳm pykabê Edjitu kurũm mebê idjaero katon me utà. Ne kam arỳm me amakkre kêt akno. Me kute amim mar kêtjao akno.

⁶Nhym Metĩndjwỳnh kadjy mrãnh djwỳnh jaxwedjwỳ arỳm àpênh djà kanga. Nãm me amijo àmra ban àpênh djà kanga nhym pãnh arỳm me biknor tokry djakam me kumên arỳm akamât kô tykkam mebê ijê. Nãm mebê ijê tỳx kute mrãmri ne me kute kàxirãxo me uwprekam kute mebê ijê tỳxja pyrãk. Õ akati rax me'ỳr bôx kadjy mebê ijê. 'Ãtũm nhym Metĩndjwỳnh kute memã axwe pãnh jarênh djà nhô akati me'ỳr bôx kadjy.

⁷Krĩraxbê Xôtômamê Gomoramê bu'ã krĩdjwỳ, kam me axwe ne me prô djwỳnh, mjên djwỳnh kupa'ã ari abeno ngjêxo ba. Metĩndjwỳnh kute me ipêx kupa'ã ne me my ta kute abeno ngjêx prãmkmurêx nhym me niredjwỳ ta kute aben kupênh ikwã prãmkmurêx. Me baje amikajmãtã me mar kadjy ne Metĩndjwỳnh arỳm memã axweo pãnh. Kuwyo memã o pãnh nhym kam kuwy meo ajkamuw nhym me mrãmri arỳm biknorkumrêx.

⁸Me kute me anoo biknor prãmja ne me me ja kôt axwe. Nãm me biptiro ikwãn arỳm amijo àpnun amibu'ã meo àpnu. Ne kum me bẽnjadjwỳr kurên kàjkwakam me rũnh'ã kabên punu.

⁹Be, Mĩgeubê ne Metĩndjwỳnh kadjy mrãnh djwỳnh raxja. Djã ne Mĩgeu Xatanajmã kabên punu jarê? Kati. Amrêbê: ne me bakukãmãre Môjdjê arỳm ty nhym kam Mĩgeumê Xatanaj ar Môjdjê nhĩ'ã aben maro dja. Djã ne kam Mĩgeu tu kum kabên punu jarê? Kati. Nãm kum,
—Gê Metĩndjwỳnh ta amã akij, ane. Jabit ne arê.

¹⁰Nhym be, me kute ar anoo biknor prãmja ne me tu mỳjja'ã kabên punu ba. Me kute me mar kêtgam ne me tu me'ã kabên punu ba. Nãm me mry djumar djào umar. Mry kute amidjwỳnhbit mar ne tu ar ba. Nhym me mry kôt kute amidjwỳnhbit mar ne tu ar ban arỳm kôt amijo àpnu.

¹¹Ỳ watĩre, Metĩndjwỳnh dja me biknor tokry djakam me kurê. Amrêbê: ne me bakukãmãre Kaĩ axwe:. Nhym me kute ar anoo biknor prãmjadjwỳ

ne me Kaĩ kôt ar amijo ba. Amrêbê: ne me bakukâmâre Barão kum nêkrêx prâmje tu me noo aknon meo ajkê. Me kute ar anoo biknor prâmjadwý ne me Barão kôt kum nêkrêx prâ:m ne ar anoo biknoro ba. Amrêbê: me bakukâmâre Kore ne kute amijo rax prâ:m ne arým bënjadwýr'a kabên punu ba. 'Ă kabên punu ba:n kam arým akuno. Me kute ar anoo biknor prâmjadwý ne me Metîndwýnh'a kabên punu ba. Dja me 'a kabên punu ba:n ĩ arým Kore kôt me biknor tokry djâkam akuno. Metîndwýnh'a kabên punukôt arým akuno.

Me kute me noo biknorja me ro'ă bikâr.

A Ped 2.13

¹²Ar amă aben jabêkam gar aro'ă ar anhô kwý krêno akrĩ. Nhy m me kute ar anoo biknorjadwý ne me pijâm kêt ne arým ar aro'ă aku. Ar akĩnhkumrêxo akrĩ nhy m me arým amipunuo ar ajo âpnu. Ga, me kă mexkam ngră kute o punuja pumũ. Me kute ar anoo biknordwý ne me ă ar ajo âpnuo ane. Amipunuo ă me ajo âpnuo ane. Nhy m me te: me kabên mex jabej mekam ama:n arým kaprĩre ne. Ga, kôk djâbêrkam kakră kakrătyk ba kajgoja pumũ. Nhy m me te: na bixadjwýrkam aman kam arým kaprĩre ne. Me kute ar anoo biknordwý ne gar ă mekam akaprĩo ane. Năm me kajgo kute mrămri ne pidjô kunĩ ô kumexkam ja pydjĩ ô kêt ne ăm pyrăk. Pidjô tu tykkumrêx nhy m me arým kraxmê arêmê ro'ă kaba. Năm me kute urăk ne tu kajgokumrêx. Dja me arým me biknor tokry djâkam akuno.

¹³Năm me ta ar ba kute mrămri ne ngô djăkrêkam ngô djăkă ari aben pymjýr pyrăk. Ga, ngô djăkrê apêx nhy m arým akăxkam mýjja punu kumexja pumũ. Năm me kabên punu jarênho ku'ên o ino re nhy m me arým pijâm ne, kabên punukam pijâm ne. Me kute ar anoo biknor prâmja ne me arĩk ba nhy m me te: kute mekôt katăt amijo bamă. Me kute mrămri ne kanhêtire arĩk ba pyrăk nhy m me te: kute omũnh mex ne kute 'ă amimrănh jakremă. Metîndwýnh ne arým amim me axweja pănh'a karôkumrêx. Akamăt kô tyk pytĩkam dja me kurê. Dja kam akamăt kô tyk ră'ă nhy m me kator kêtumrêx.

¹⁴⁻¹⁵Adăo ar amikam kra jadjuw nhy m arým abatănh ne. Abatănh ne arým amikam kra jadjuw. Kra jadjuw nhy m arým abatănh ne. Abatănh ne arým amikam kra jadjuw. Ne amũ aben nhijuk'ă kra jadjwýro tē. Adjwýro tē: Adjwýro tēm tămtă kam arým 7'ýr o bôx. Aben nhijuk'ă krakam kra'ă akren arým 7'ýr o bôx. 7'ýr o bôx nhy m me arým krajamă Enoki jarê. Enoki ajte me kute me noo biknorja'ă memă kum,

—Ė, Bënjadwýr djwýnh dja Metîndwýnh nhô me ja krăptĩ: kubê 10.000mê ro'ă bôx. Ne kam arým me kum Metîndwýnh kĩnh kêtja kunĩmă axwe pănh jarê. Apýnh me âpênh jaxwe djări pănh memă arê. Metîndwýnh'a kabên punuja kunĩ pănh memă arê nhy m me arým amijaxwe ma. Năm ă me bakukâmâre Enoki memă ane.

¹⁶Me kute me anoo biknor prâmja ne me bën prĩkam kabên ban apýnh mýjja'ă kabên punu prâ:m. Me kute amidjwýnhbit markam ne me kum

apŷnh mỳjja punu prām ne kôt ar amijo ban amijo àmrati ba. Ne kam me ò nèkrêx kumex pumün amim,

—Ba gêt tāmŵã kôt ar amijo iba. Ne kam arým inhõ mỳjja kumex ne kôt irax. Nãm me ã amim anen kam kum me ò nèkrêx ngrireja kĩnh kêtukumrêx. Me kum me ò nèkrêx kumexjabit kĩho ba.

Me kute Jeju markumrêx djâpênh'ã memã karô.

¹⁷Akmere, àpnhĩre ar, ar ga dja gar atemã amijo tẽ. Bẽnjadjwỳr djwỳnhbê Jeju Kritu kute ar anorja dja gar ar kabên mar tỳx. ¹⁸Nãm ar arým me'ã ar amã ajarẽ. Me kute ar anoo biknor prāmja'ã ajarẽ. Nãm ar ar amã,

—Dja Jeju bõx 'ỳr nhym me arým gwaj bajaprỳ:o ba. Dja me amidjwỳnhbit man kum mỳjja punu prām ne kôt ar amijo ba, ane.

Kritu kute ar anorja ne ar ã ar amã ane. Dja gar ar kabên mar tỳx. ¹⁹Me kute ar anoo biknor prām ja ne me abenbê me kurêo ba. Ne pykakam mỳjjakôtbit amijo ba. Nhym Metĩndjwỳnh Karô kute meo ba kêtukumrêx.

²⁰Akmere, àpnhĩre ar, ar ga dja gar atemã amijo tẽ. Kritu kabên mexkumrêx. Tãm dja gar tu amim markumrêx ne amim kabên maro tẽ:n amũ maro amikamên mar rax ne. Metĩndjwỳnh Karô dja gar aman Metĩndjwỳnhmã akabên aba nhym Karô arým ar akôt o kangô.

²¹Metĩndjwỳnh kum gwaj bajabê. Ar gadjwỳ dja gar amã abê rã'ã ne 'ã adjukanga kêt. Ne Bẽnjadjwỳr djwỳnhbê Jeju Kritu jabej ajkam ama. Ta dja bõx ne kum gwaj bakaprikumrêx gwaj kôt batĩn ne ar baba rã'ã: rã'ã ne.

²²Me kwỳ kute amim Jeju mar kêtja dja gar amã me kaprĩn 'ỳr me o akêxo tẽ gê me tu amim markumrêx. ²³Nàr, dja gar ano katon me axwebê me kwỳo akêx. Me kwỳ kute amijo punu mexja. Me ja on biknor karô dja gar memã ano katon me axwebê meo akêx. Kute mrãmri ne me'õ kuwykam ãm nhym me kum kaprĩn kam no kator ne kute pa 'amỳnh ne bõm mênh pyrāk. Dja gar me punu kôt ar apunu'õ pymaje amijã ano tỳx ne.

²⁴Metĩndjwỳnh ne kute amim ar apytār mexkumrêx gar kam ajmã akute kêt ne katāt ar amijo aba rã'ã ne. Metĩndjwỳnh ra:x nhym me kum uma:. Dja amimexo ar ajo mex gar arým ajaxwe kêt. Nhym kam arým amikabem ar apumjuwn arým prĩne ar ajo kĩ:nhkumrêx. ²⁵Me Batĩndjwỳnhbê ne me bapytār djwỳnh. Pydji kute mỳjja kunĩ mar ne krã me:xkumrêx. Ba kum,

—Mrãmri ame:xkumrêx ne apyma:kumrêx. Araxo abê kumkatikumrêx. Me kunĩ:mã Abẽnjadjwỳr djwỳnhkumrêx. Ajitỳ:xkumrêx. Amexmẽ apymamẽ abẽnjadjwỳrmẽ atỳxmẽ ne ga aje 'ã aminhinomã amimênh kêtukumrêx, ane. Gê me kunĩ ã Metĩndjwỳnhmã ane. Tãm ne ja.